

Hopi interes di studiantenan pa un Aruba sostenibel

ORANJESTAD - Casi 500 estudiante y docente a inicia dialuna mainta na Cas di Cultura e di tres Green Education Symposium organisa pa Biblioteca Nacional. Ayera nochí tambe a organisa un charla cu diferente oradonan pa publico en general.

E publico no ta tabata grandi pa scucha entre otro profesor Frederic Stoss cu a elabora riba e topico di clima y con e ta wordo afecta.

E studiantenan invita pa e prome dia di presentacion parti mainta, cu lo tuma luga henter e siman aki pa diferente scol, tabata di La Salle College, Filomena College, Colegio Arubano y IPA. E meta di e evento ta pa conscientisa pero tambe pa wak con e hobennan mes por yuda logra pa cu e vision di 2020. Na e aña ey Aruba mester produci 20% di su propio cuminda. Pues aña aki e tema ta cuminda sostenibel.

Director Natalie Maduro di Santa Rosa a mostra con a cambia e imagen di Santa Rosa cu a bira mas activo den promove agricultura, cria y pesca, proveyendo e hermentnan cu e personanan cu ta dedica nan mes na esaki mester di nan. Por ehempel, door di segura mester busca

posnan cu awa cu por wordo uza pa muha mata, awa di sceptic tank ta wordo procesa y bira adecuado pa uza tambe pa matanan. Recientemente a adkiri un sistema moderno cu ta haci e awa adecuado segun standard internacional. Tur esaki pa cumpli cu e meta di Gabinete Mike Eman pa Aruba ta mas sostenibel, segun e relato di gobierno mes. Tambe por a mira un video di e proyecto na Kudawecha Scol Basico cu su proyecto "Grown's Pilot Project" unda studiantenan a siña planta mata di berdura cu despues nan mes a uza pa haci cuminda. Igualmente tin e ehempel di EPB Santa Cruz cu tin un proyecto di Greenhouse den desaroyo y via cual ta produci matanan tanto di fruta como berdura cu ta wordo bendi cu publico na Santa Rosa.

Pesca sostenibel

Un proyecto cu hopi estudiante no tabata na altura di dje tabata esun di pesca sostenibel. Taino Heinze a splica cu no ta e piscado chikito ta e problema cu escasez di pesca rond mundo, pero esunnan cu a haci di esaki un industria, uzando netnan grandi cu ta lastra tur pisca bay cu nan, inclusivo chikito nan. "Pesar cu nan ta wordo tira



bek den lama, mayoria ta muri", Heinze a splica. El a agrega cu "mayoria hende no sa pero gran parti di nos pisca ta wordo importa. Apenas 50 kilo di pisca ta wordo captura pa dia na Aruba, compara cu 200 kilo di antes." "Wow", tabata e reaccion di algun grupo di estudiante.

WEB tambe a duna su contribucion den e Green Education Symposium unda ing. Marc Croes a papia riba e importancia di awa saludabel. "Sin awa saludabel no tin bida," ing. Croes a pone hopi enfasis riba dje. "Hopi biaha a lubida e balor real di awa," el a conclui su discurso.

Loke a hala hopi atencion tabata e video "un cunukero, un piscado, un plato" na unda cu

Urvin Croes a bishita e cunucu di Sra. Maureen Laaf-Ras y despues a cumpra un pisca for di Centro Hadicurari y a traha un plato sabroso cu ingredientenan local.

Setar ta e sponsor principal atrobe y vocero Suzy Maduro ta splica cu e compania ta para innovacion riba tur tereño. "Awendia lo nos mester bay pensa riba nos cunukeronan moderno cu lo aplica otro sistema y tecnologia pa por tin miho resultado den agricultura." Pa loke ta trata tecnologia moderno, Sra. Maduro ta pensa cu medianan di telecomunicacion lo yuda pasa informacion vital cu por uza y tambe un medio kisas con pa distribui e cuminda despues pa otro nan. □